



I

Mag. St. Dr.

P

*Sutikowski Nicolai. Maniquetus rovine-  
scens juvenis ac Potentiss. D. D. Vla-  
dislas IV etc.*

Prison 44

ME



Biblioteka Jagiellońska



stdr0002035

# Manipulus Reuirescens

*Serenissimæ ac Potentissimæ Dñi,*

**D. VLADISLAI IV.**

**Inuictis: Polonia, Suetia,**

**Gothia, Vandalorum Regis**

**HÆREDITARII.**

*Magni Ducis Lith: Rus: Prus: Mazonia, Sa-*  
*mogitia, Liuania, &c. &c. Domini*  
*Clementissimi.*

**Diuinâ gratiâ collectus & Cœlitus delatus**

**In Urbem Cracouiensem feliciter illatus.**



**M. NICOLAO SVLIKOWSKI,**

*Profes: Dial: Schol: Nouodnor: debita submis-*  
*sionis ergò oblatus.*

---

**C R A C O V I Æ,** *Panu. Muchetee*

**In Officina Typograph: Martini Philipowski,**

**Anno Domini, 1638.**



Præsentia Regis pax est populorum,  
tutamen Patriæ, immunitas plebis, Mu-  
nimentum regentis aura languentium,  
lætitiâ Ciuum, solatium pauperum &  
sibimetipsi spes futuræ beatitudinis.

*Apri: Lib: XXII. Abus.*

1720  
BIBLIOTHECA

UNIV.



JAGELL.

CRACOVIENSIS



*Andem Serenissime Rex, in Regnum  
Tuis Virtutibus debitum, maiestate  
eximium, Coelituum decretis credi-  
tum ac permissum, post tanti tempo-  
ris interuallum, exoptatus aduenisti. Tandem Di-  
uorum Indigetum delubra, Tuorum maiorum, ad-  
mirabili munificentia huius Regni, Tutelarium,  
Mausolea exornata, & Tuis trophaeis depicta, post  
tot declinatos itinerum labores, asperas difficultates  
Coeli, post tot ventorum seuas contumacias, supera-  
tas. pio officio cumulans Sanctissimos Cineres, Tu-  
am Regiam, quae Te Natum excepit, crescentem ve-  
nerata est, adolescentem amauit, Virum Regiam Ma-  
iestate decoratum submissionis genere complectitur vi-  
sistasti. Tandem Tuos oculos Sole & lunam nobis  
amiciore, vultum Tuum diuinum quid spirantem,  
Caput Tuum Augustissimum Sapientiae sedem, pe-  
ctus Tuum fortitudinis domicilium, & aram pietatis,  
visendam Amplissimis Senatoribus, Illustribus  
pro-*



Proceribus, primarijs Sacerdotibus, *Academiae* Doctoribus *Vrbium* incolis, gratissimam intulisti. Iam nunc mente & cogitatione quivis prospicere potest, ut quanto tedio, ob absentiam sui Principis, *Universi Patriae* Cives conflictabantur, tanto gaudio nunc perfusi ex aspectu iucundissimo, gestiunt & exultant. Non enim possunt intra sua praecordia continere laetitiae aestus, nec sciunt publicae hilaritatis cohibere modum, aut comprimere vocem, & affectum, Cum ei nullus obex possit inueniri. Suggestit laetitiae Materiam, Tuus in Patriam amor, colligit segetem vberriam hilaritatis, in omnes aequalis Tua clementia, dictat gaudiorum documenta Zelus cultus diuini promouendi. Proficiscentem Te publice priuatimq; commendabant Deo Ter Opt: Max: sedula pietate, multis sacris, ardentibus votis, & suspirijs studebant demereri caelestes Spiritus, ut illorum suffragatione, hunc festiuissimum aduentum possint conspiciere. Nunc identidem ex Tuo obtutu suauissimo, in animis omnium coarctatur incredibilis voluptas. Non ergo Roma *Urbs* gentium, *Capitolium* totius orbis; extollat graue pietatis argumentum,

tum, erga Principem Augustum, quod aliquando Senatus, cum equestri ordine, vniuersoq; populo Romano in lacum Curtium quot annis ex voto stipem iaciebat, pro salute sui Caesaris, quo Principe, nullus in Consilio grauior, in dictis affabilior, in bellis gerendis felicior, in pace confirmandâ & stabiliendâ nullus charior legitur extitisse. Procul assentationis illecebræ, dicam ipsa veritate attestante, Poloniæ Tuæ Regnum, non profanis victimis, sed ardentissimis votis, non superstitiosâ obseruatione, sed religiosissimâ pietate, à Diuina Maiestate nihil aliud ex optabat; nisi Principis reditum in columem, & Maturum, qui & ad belli momenta est exercitatus, & ad excitandam beneuolentiam ingeniosissimus, & ad dirimenda bella paratissimus, ad pacem conseruandam prudentissimus. Hoc agebat, hoc Maximè sat agebat, & numina cœlestia exoraret, quæ vt Principem sibi similem dedissent, ea quoq; ex sua benignitate, integrum, bene valentem, pignus diuinitus datum seruarent in colume. Non repudium habuere Nostra vota apud Deum, ex suo favore desideria & spem nostram, superarunt Cœli Indigetes omni Cautione, summâ gratiâ ab ingru-



entibus tui sunt periculis, in quorum fide & clientela,  
præsidium firmissimum, Regni, libertatis, fortuna-  
rum Nostrarum erat collocatum. Merito igitur e-  
xultat quoque Mea hominis infantis ex auspiciatissimo  
aduentu Principis & erumpit licet sit tenuis Oratio.  
Si Cræsi filio quem Mater elinguem, & Mutum in lu-  
cis usuram ediderat, vehemens affectus extorsit vo-  
cem excutiente pietate, quam non concesserat Natura.  
Academie alumnis, quos in usum, & obsequium  
Regum educat, quis præcludet vocem? Cum qui  
etiam rebus mutis & pene dixerim ipsis rigidis scopolis  
excutere potest dicendi libertatem, Principis autori-  
tas, & in Musas Academicas amor. Recogno-  
scunt enim illæ, cum pietatis cultu, Ceu vernæ Tuorum  
maiorum clarissimorum, fortunis tenues, a Mortuis  
nisi colore dissimiles, Tuum patrocinium, Tuam fi-  
dem, & in spem melioris fortunæ eriguntur, Cum Te  
non autorem, non parentem, sed velut Numen singu-  
lare, ad res suas subleuandas, cœlitus demissum vene-  
rantur. Plurimi Cuium argumenta letitiæ in signis,  
non modo in vultu præferunt, iam in visendis appa-  
ratibus, in arcubus triumphalibus, in splendore diei  
per



per artem auctis ignibus, attestantur. Sed Musæ  
Academice vel potius Tuae Serenis. Rex ex Tua in-  
columitate, in columnes & felicitate se felices appellant,  
eternum obsequium spondendo & recipiendo. Et hu-  
ius quidē letitiæ, nemo numerare Causas, quia infini-  
tæ sunt, Nec argumenta quærere potest, quia splendo-  
re suo vniuscuiusq̃ facile percellunt aspectum. In Tuo  
enim animo Serenis. Rex, tanquam stellæ quædam vir-  
tutes omnes elucescunt, tum inter illas quasi lucis & vi-  
tæ dispensatoris solis, cultus honoris Dei lumen resplen-  
det. Laudent Romani Numam Pompiliū, extol-  
lant Græci Lyncurgum, alijq̃ populi, qui sacra, Cere-  
monias sibi inuenerint, efferant laudibus suos religio-  
num autores; his omnibus Te vnum Princeps pijs-  
sime præferimus, Cui tantus Zelus Dei in animo inse-  
dit, vt nemo vnquam, non dicam anteire Te, sed nec  
par Tibi in religione seruandâ augendâ, ornandâ, in-  
ter huius sæculi Principes inueniatur. Nemo est qui  
nesciat Racouiana pestis Arii, in vinea Christi, quas  
arumnas ederet, quas turbas in populo daret, deroga-  
ret iustum honorem Diuine Maiestati. Iam illud  
monstrum teterrimum Ecclesiæ, & omnium fidelium  
Chri-

*Christi Militam, religioni quâ societates regnorum & populi tranquillitas confirmatur illudebat, hostili oculo præcedentes nos spectabat, ringebatur, tumultuabatur, Cum fidem Christi publice & Manifeste deprædicari videret, pernicioso suo dogmate, turbas ac sediti-ones, iam in Comitijis Senatorum, iam in congressu Nobilium ordinum, excitabat constrictas Conscientias imperitæ plebis in perpetuum exitium secum trahebat. Hanc Pestem Rex Potentissime extinxisti, furori & audaciæ improborum restitisti, communi Calamitati nuper in Comitijis medicinam adhibuisti. Extra regnū illa furia fugit, perculsa terrore & Tua potentia, quod non infecerit vniuersum regnum, vt voluit, quod seditiones, ad effusionem sanguinis, vt sperauit, non commouerit, quod Ecclesiam Dei florentem reliquerit. merore afflictam ac profligatam se sentit grauissime. Conuertit modo oculos, in latibulis delitescens, ad hoc Regnum Nobilissimum, religionis, deuotionis, & omnium virtutum quasi templum, illudq; ex faucibus sue contagionis ereptum esse luget. Gaudet igitur Academia tam excellenti bono, quo omnibus sine periculo, salutis, cum summa omnium rerum pace & tranquillita-*



te frui liceat, & Te Augustissime Princeps, gratulatione complectitur incredibili, veneraturq; impensissime, tanquam missum à Deo Iudicem, ut iustitiam in terris tuearis, ut insolentes castiges, virtute praeditos premijs ornes & amplifices. Solit enim Te & observat deuotissime, non tantum ut à Deo electum Regem Augustissimum, sed ut Aula Iagellonis Tuorum Maiorum, quorum insignia in parietibus excisa collucet, ad memoriam per Te seruetur sempiternam. Stetit florens imperium Persarum in diuturna felicitate, propagata est illius amplitudo longè lateq; nullam ob aliam virtutem, aut potentiam, nisi quod Persæ, præter omnes gentes & Nationes, Regalem Maiestatem, omni cultu & veneratione maxima sunt prosecuti. Quis impedire aut obstare audebit? Ne Te Regum fauentissime Academia etiam cum dispendio propriæ salutis, rerumq; suarum detrimento obseruet ac veneretur. Habet parentes charissimos, quorum beneficio, vitam, patrimonium, traditum retinet, diligit Patronos quorum adminiculo, & his fruitur, & plurimis alijs augetur; amat Mæcenates, quorum subsidijs in amplissimo consilio, in sublimi gradu dignitatis

B

Sacer-

Sacerdotij tanquam in arce Prælaturæ collocatur. Si  
spectet Tuam Serenissime Rex gratiam, à quo multis  
beneficijs ornata, immensum est ac plane diuinum,  
quod Tibi debeat, qui Tuo præsidio admirabili, curâ  
& Conatu singulari, parentum patrimonia, patro-  
norum libertates, Mæcenatum munera, publicos ho-  
nores, illi vno tempore reddidisti: Per Te illi vita  
reddita, Patria reddita & libertas. Quamdiu er-  
gò erunt literæ Academicæ, quamdiu stabit hoc pietat-  
is & disciplinæ domicilium, tam diu Rex Potentissi-  
me viucs, & quantum alijs operibus est ætas detractu-  
ra, tantum Tuo Pátrocinio, addet ad gloriam & no-  
minis immortalitatem. Nemo ergò Academiæ ob-  
sequium improbet, nemo Contemnat grati animi pro-  
pensionem, si quidem ingratisima foret, si periculo in-  
teritus liberata, animum ingratum retineret. Ut  
Græcia omnis disciplinæ Mater, & Sapientiæ excul-  
trix, ingenioso Commento suo & sincero aram Gratia-  
rum in medio fori extruxerat, & gratitudinis delu-  
brum sumptuosè exornatum posuerat, ut plebem ad  
memoriam, & recordationem acceptorum beneficio-  
rum excitaret. Decuit & Academiam, ob multam  
libe-



*liberalitatem Tibi obstrictam, ut memoriam nunquam morituram hoc cultu obsequiorum testaretur, & in Principe tantam benignitatem cum commendatione adoraret; quo Conspecto intelligeret fortunatissimo imperio suo, ut nunquam optimos Reges, ita Mæcenates sibi amplissimos defuturos, & speraret quod omni genere virtutum excellentissimo Principe uteretur, per illum sibi successores dignos tanto Patre filios nascituros. Ea de Causa Tuam Munificentiam, quæ est bono publico utilis magnopere, in extruendis Scholis Nouodunorfcianis, sacrarijs omnium virtutum, quæ omne genus meritorum, non solum ad æquare, sed etiam longè antecellere videtur, commendabilem posteritati transmittet. Magnifica in publicis ædificijs extruendis, reparandis, munificencia, admirabilis in rebus sacris ordinandis, iuuandis, illustris in propagandis Patriæ finibus, laudabilis in hoste propulsando & coercendo, popularis in spectaculis & ludis exhibendis, in necessitate Urbibus providendâ excellentissima. At omnium tantæ gloriæ splendorem, in literas tenuiores, literarum Professores alendos & ornandos, veluti sol lucidissimus obscurat*

ria effusa. Est enim alterius liberalitatis aliqua dignitas, est admiratio, popularis auræ est Consecratio, vanæ gloriæ, aucupatio; Sed liberalitas in literas, et patrocinium earundem, immortalem gloriam et premium vitæ beatæ Consequitur. Illa ad splendorem, hæc ad Necessitatem, illa ad breuem, fluxam, Caducam, instabilem, et cito marcescentem voluptatem ordinatur: hæc ad veram, firmam, constantem, felicitatem dirigitur. Cum ad bonum Ecclesiæ ad usum Reipub: et commoda Patriæ spem educat fouet Reipublicæ amplissimam. Quid enim est educare? quam patris induere affectum, multos labores incommoda varia, non minus animi quam Corporis solitudines, anxiam custodiam suscipere, ne ledatur ætas infirma, ut salus ab instantibus periculis, nondum bene valens muniatur, ne iuvenes tardi ingenio, aliquo commodo destituantur, qui longo et solerti studio prompti, qui ab ipsis incunabulis fuerunt acuti ingenij, tandem temporis progressu, aut otio, aut luxu, aut temulentia, aut alia ex causa obrusi et languidi euadant: hoc est Professorum educare. Hæ Causæ sunt obsequiorum Academiæ, quo enim illorum vberissimam Materiam  
consi-



considero, eò magis in infinitum crescit Oratio. Multiplici igitur fenore gaudicrum, cum Poloniam, tum Academiam Tuo aduentu cumulaſti Sereniſ: Rex, primum quod tantopere exoptatus adueneris, deinde quod feliciter reualueris, & in Regnum Tuum, licet alicubi Cælum, quantumuis amœnuiſ hauſeris, redire properaueris. Reliquiſti illas delicias Germaniæ, puriorem auram, affinium, Conſanguineorum illuſtriſſimæ ſtirpis amplexus ſuauiſſimos, qui non vt hoſpitem, non vt fratrem Potentiſſimus Monarcha Auſtriacæ domus lumen & columen, ſed vt numen Cœlituſ demuſſum excipiebat; adeo vt gens illa alioquin Regum obſequiſ impenſiſſime dedita, nullum unquam ſuorum Regum regaliuſ exceperit quam Te hoſpitem. Nam velut Ulyſſes ille, cum vidiffet prodigioſe fertilitatiſ terras, opulentiſ regioneſ, amœnaſ vrbeſ, ad aſperam tamen Ithacam, per tot discrimina rerum properauit, ſic Tu Sereniſ: Rex, in Regnũ Tuum non publico curru, ſed diuino vehiculo properaſti, & Ciuibuſ Patriæ ſolatiuſ, regno letitiuſ, Muſiſ Academiciſ voluptateſ reddidiſti. Fuit aliquando in deliciſ Veſpaſiano Cæſari, Villula Coſona,

ut ne Imperator, delictum gentium, frequenter conuenire erubuerit, quæ hominem tantum ediderat, nihil de pristina eius tenuitate mutari voluit, ad cultum humilem, agrestem, nihil addere splendoris, ne quid oculorum consuetudini deperiret, statuens causam, quod in ea primum vagiisset, & spiritum vitæ hausisset. At Tu Rex potentissime in Polonia, Princeps & Princeps quidem & belli gloria clarus, & pacis ornamentis insignis editus es, quæ Te genuit, ad eam tanquam filius venisti, quæ Te educavit, tanquam alumnus exosculatus es, quæ Te coluit Principem, tanquam Parens affectu amoris prosequeris. Hic ego mihi temperabo, ne quis ex meæ dictionis tenuitate magnitudinem & dignitatem Virtutum Tuarum obscurari putet, qui nec à natura, nec à longa consuetudine ad dicendum sum instructus. Quis enim Te in nostra defendendâ patria eternum Tibi obligatâ scientior, unquam aut fuit, aut esse debuit, cui à Natura talis genius est inditus, bonitatis, ut propter amores eius, nec labores fugere, nec periculis deterreri, nec otio abstrahi potueris. Ubi enim prima literarum studia, quibus ætas confirmatur absoluiisti, è ludo literario in Campum, ex  
tepi-



repidis parietibus sub Iouem frigidam, ardorem æstus,  
asperitatem hyemis, iniuriam ventorum, cœli inclemen-  
tiam perferre euolasti. Prima Tyrocinia militiæ  
deposuisti, contra populum & robore potentem, opibus  
abundantem, potentiâ instructum, sedisfragum Mos-  
chum, ubi tanquam in theatro virtutis Tuae specimi-  
na exhibuisti. Quorum si homines obliti fuerint,  
loquentur scopuli niuibus obsiti, ipsis auibus inuij mon-  
tes enarrabunt & Tuam VLADISLAE Serenis-  
diuinam fortitudinem, in periculis, & incredibilem a-  
morem in genus Polonum attestabuntur. Testis est  
gelidissima illius Cœli plaga, quos labores suscepis,  
quas difficultates sustuleris, quas molestias & ærumnas  
superaris. Cum Imperatore & Parente Tuo, cui  
principatus victoriarum inuidia conquiescente delatus  
fuit, ad ultimam perniciem & graue periculum com-  
pegisti. Testes sunt illæ arces, mirabili artificio, &  
validissimis munitionibus, altis fossis profundis lacu-  
nis, munitissimæ, nec ingenio, nec robore expugnabi-  
les, quas tu excidisti, euertisti, & solo æquaasti. Non  
poterant iuueni quidem adhuc, sed forti victori, illi  
barbari & immanes populi, more ferarum viuentes  
ampli-

amplius resistere, sed infugam eiulantes conuersi, inter  
Sylvarum latebras, & nemorum recessus, ut reliquum  
vitæ spiritum finirent, à Te precabantur. Tanquam  
Athleta generosus, inter milites pugnabas, inter pri-  
mipilos Centuriones Ductores exercitus, vclut ille A-  
lexander cum Regibus de laude decertabas. Vide-  
baris iam multis annis, arma tractauisse, qui primus in  
aciem Martis descendisti, heroica magnanimitate ob-  
armatus, bene merendi de Repub: nostrâ, nullam oc-  
casionem omittebas, obijciebas Te periculis pro Salute  
Ciuum, oppositu laterum Tuorum aditus hostium, pro  
Deo, orbeq; Christiano intercludebas. - Profectus  
es contra hereditarium, diuorum Cœlestium, & religi-  
onis Nostræ hostem insensissimum, inflammatum fu-  
rore, cecâ libidine dominandi Solimanum. Inse-  
quebantur Te alij discedentem, alij desiderio & lachry-  
mis languentes, alij votis, & precibus supplicantes Te  
concomitabantur. Quis illa tripudia, quis ouatio-  
nes, quis triumphos immodicos digne explicabit?  
Cum in castra cis Istrum aduentares, milites diutur-  
nis laboribus fracti, fame, siti, squallore enecti, obliui-  
scebantur suorum malorum, nouas letitias & volupta-  
tes,



res, animo concipientes, & mentes quæ præ dolore e-  
marcuerant, à desperatione ad salutem, à morte ad vi-  
tam, à calamitate in hilaritatem erigentes & Tuo a-  
spectu præsentì excitantes. Imminebat prædo Asi-  
aticus, orbis non Dominus sed inquilinus, designabat  
oculis, milites à Cædem, florentissimas Urbes ad vasti-  
tatem, agros ad solitudinem, vocabat, & tristes euen-  
tus belli orbitatem, minaci vultu, scintillantibus oculis,  
ore truci intentabat. Paucis expediam Rex Poten-  
tissime erigebat se turpissimus Archypirata in spem  
victoriæ, multarum palmarum vetus gladiator sibi  
applaudebat, cum ob suos felices euentus, tum nostros  
animis concidentes, ad internecionem venturos pollice-  
batur. Continuo Te adueniente, pro Catholicâ fide, pro  
amore Polonorum, pro aris, & focis pugnaturus, cun-  
cta præsidia adueniēre fauentia, fama Tui aduentus in  
Castra, ita eum attriuerat, & afflixerat ut Cælum æ-  
rem, aquam ad victoriam obtinendam haberes propi-  
tia. Unde effectum est, ut accepta clade hostis, par-  
tim ferro, partim tempestatibus Cœli, & terræ, ut se  
fustum & deletum, derelictis Vxoribus ac Matribus  
rumorem qui deferet & Tux victoriæ gloriam non

habuerit. *Hæc fuerunt digna laude, digna immortalitate, & admiratione digna, cum Tu iuuenis ætate, sed Viribus Maturus, hostem furem audaciâ, scelus Christiano orbi anhelantem, & magnopere præfidentem suis recutitis sicarijs, coercuisti, compresisti, à superbia & fastu, ad fugam & trepidationem animi, deduxisti. Nimirum Serenis Princeps felicissimus es noster bellator, maiore felicitate res nostras, & Patriæ & formidolosas egisti, quam Penpeius Romanorum Principum bellicosissimus, aut Sylla Dictator felicissimus. Cum Tuo ipso aspectu hostes, ab insania ad pacem, à furore ad modestiam, renocasti. Nouimus & his temporibus Te absente Tuam felicitatem, vel potius Nostram coluimus, licet augebat solitudinem, & desiderium nostrum, mora opinione diuturnior, quam longi hi menses, quam tardæ hebdomadæ videbantur nobis currere, quas sine Te transigimus. Quibus hi tres menses ac ne quidem exacti, lustro, aut decennio visi sunt prolixiores. Sicut numerantur hæræ anxij parentibus, ad diem destinatum reducem expectantibus filium, ita fatiscit at patritia, & nimio dolore sollicita, præsentiam Tuam ipso*  
sole



sole iucundiorē lachrymabili voce reflagitabat.  
Quousq̃ tandem Serenis: Princeps moraberis, vita  
ipsa mihi charior, ergò ne oblitus mei, poteras ex præ-  
cordijs, meis elabi, quæ Te genui, quæ Te educaui,  
Principem Creatum adoravi. Si nunc istinc prius  
ad me aduolabis, quam Tuorum propinquorum, desi-  
derium ardens expleueris, quam Principum externo-  
rum, amoris fratrum pietati satis feceris; dubito e-  
quidem an vnquam Te sum conspectura denuo. Quod  
si grauitate votorum meorum temporis spatia vellet a-  
liquis demetiri, iam Te plus decennium abfuisse inue-  
stigabit. Multum quidem Principibus externis de-  
bes, multum inuictissimo Cæsari Socero Tuo ratione  
affinitatis, at mihi plurimum debes nomine pietatis.  
Liceat mihi nunc ex iure meo conqueri liceat lachry-  
mari. Dedit Tibi Cæsar Sponsam Serenissimam at  
ego vitam, Austriacæ gentis vinculo cognationis co-  
pulatus, at mihi Poloniæ Natus. Licet enim nec  
amenitate, nec fertilitate cedam alijs, hanc certe mi-  
hi propriam & maximam gloriam vindicabo, quod  
Te Regem salutârīm elegerim. Talibus qucrimo-  
nijs cum vberissimis lachrymis, quas tum impatiens eli-

ciebat amor Patria Te sibi à teipso reflagitabat. No-  
uerat enim afflictissima ciuibus esse Principem id quod  
animā corpori, aut solem vniuerso terrarum orbi, sine  
quo viuentia permanere non possunt. Difficile enim di-  
ctū est, an maiorem felicitatem, in coercendo furore, &  
insaniā hostium comprimendā ferocissimā, quā in  
domesticis negotijs tractandis, & in melius instauran-  
dis declaraueris. Hoc inusitatū est cuiusdam felici-  
tatis argumentum, cum absq; temeritate priuata do-  
mus, si paterfamilias, paulisper lares suos domesticos  
deseruerit stare non potest. At in Regno Tuo flo-  
rentissimo, in hoc vasto imperij corpore, vbi sunt lin-  
guæ varia, vbi mores multiplices, ingeniorum diuer-  
sorum membra, nullæ coortæ similitudines, nullæ noua-  
rum rerum molitiones, nulli tumultus, excitandorum  
periculorum, in Tua absentia emerferunt, sed omnia  
pacata tranquilla Optimi & Maximi Regis imperio  
floruerunt. Omnes enim Regni ordines diuinam Ma-  
iestatem orabant feruentissimis precibus, vt cuius fe-  
cit, clarissimis indicijs faustissimam inaugurationem  
eadem gubernationem Tuam letissimis successibus  
quoq; regeret promoueret secundaret. Multitudo  
agre-



agrestium, quæ à Te multis beneficijs ornata fuit, pestem ac perniciem, Te absente tentabat moliri, non parua incommoda Roxolanis oris, ubi est quasi theatrum militaris disciplina conabatur inferre primo rebellionem postmodum armatam obijciens perfidiam erupit in apertum. Sed Tua admiranda Prudentia & Consilio bellicosissimis exercitus Tui Ductoribus communicato, fregisti & superasti illorum Contumaciam, & quantum ille grex Kosachorum sibi ad interitum & cladem æternam precipitium parauit, tantum Tibi erexit theatrum gloriæ, & nobis tranquillitatem firmasti sempiternam. Idcirco cum ordo Nobilium Tuam claritatem in Patriam, & felicitatem cum gratulatione admiratur, cum Te vniuersus populus victorem cum summa veneratione prosequitur, etiam Academia cum testificatione æterni obsequij, Tuos triumphos, Tua ornamenta quibus æternitatem pro meritis es, deprædicabit, & ex suis plenis eloquentiæ alueis concinnis periodis depinget, quicquid est elegantiarum, quicquid aureorum verborum, quicquid splendoris Tulliani, in laudes Tuas depromet. Videt illa tot trophæa, tot coronas, aureas, tunicas palmatas, videt spo-

lia, Deo & Sanctissimis Cœlitibus afflicta & æquissimis  
animorum oculis intuens veneratur. Si modum & ra-  
tionem clarissimarum victoriarum, in quibus non mo-  
do salutis retinendæ sed etiam existimationis conser-  
uandæ integritatem consideremus, nouo modo, miris  
artibus, hostes superasse videris. Cum eos non modo  
victoricibus armis coerceres, honoribus etiam amplissi-  
mis ornares, iacentes extollereres, amplificares deperdi-  
tam illorum dignitatem. Cuius vnquam bellatoris  
tanta potentia fuit, vt in belli insaniâ, clementiæ, in fu-  
rore Sapientiæ documenta exhiberet? Inter fulgores  
armorum, irradiabat in Te lenitas animi, vt hostibus  
fortunas Ciuium impetentibus, in Regnum proprium  
inuolantibus veniam concederes. Irradiabat in Te  
mansuetudo cum prius perfidiâ audacia Tecum decer-  
tare voluerint, Tu beneuolentia Tua & clementia fu-  
rorem virtutibus, consilio temeritatem, vim vi, ma-  
num manu superasti. Irradiabat in Te Sapiencia am-  
plitudini fortune coniuncta, quæ adeo nota fuit hosti-  
bus, vt licet non sine acerbissimo animi dolore cogno-  
scerent, tamen innatâ deposita offensione in victores  
amatam sepius laudauere. Talia qui faciat, non cum  
hero-



heroibus, est comparandus, sed ipsi Deo simillimus iudicandus. . . Noluit ergo Academia usu & mancipio Tua, à quo solatia in calamitate, in oppressione defensionem, accepit comparatas tot victorias, redditam salutem civibus, constitutum otium Patriæ, constabilitam Ecclesiam Dei ingrato obrucere silentio. Excitavit illa Tua trophæa, & consecrauit consequenti ætati, celebrauit laudes bellicas, illasq; non solum nostris sed etiam omnium gentium literis & linguis in scriptura est æternitati, ob ciues servatos, ob vindictam ex hostili servitio patriam, ullam ætatem de Tuis laudibus conticescere præmittit. Semper futura sunt loquaciores literæ, ob beneficam Tuam voluntatem, ob pietatem in supplices, & literarum amorem, perpetuam gratorum animorum significationem declarabunt, & Mnemosynon æternæ submissionis erigent & ornabunt. Tenuerunt huc usq; sub umbra alarum aquile gloriosum otium, nunc in occursum prodeuntes, non munditiâ politæ, ad ostentationem, non exquisiti ornamenti ad Pompam Tuam festivam instructæ, sed candore verecundæ Tui vultui benigno, faciei dignæ imperio sese exponunt. Accipe facilis & Sinceri animi

nimi Tibi expressum obsequium: Precantur illæ &  
quidem nec diu nec noctu vota cum Cameris fundere  
cessabunt, vt Deus cui in terris suam potentiam & au-  
toritatem cum Serenissima Regina Domino no-  
stra clementissima partitus est, arduos labo-  
res, pro Communi bono, Ecclesiæ  
decore, susceptos, felici successu  
prouehere dignetur.

D I X I





Sub felicibus auspicijs Adm. R<sup>di</sup>. &  
Mag. Dni. Alberti Borouij Sacrae  
The. Doctoris & Profes. Custodis  
S. Floriani Cano. Scalbimirien. &  
SS. Omnium. Almae Vniuersitatis  
Cracouien. Vigilantis. Rectoris.

Impensis ex fundatione Generosi  
Dni. Bartholomæi Nouodworski  
S. Ioannis Hierosol. Equitis Meliten  
Commendatoris Posnanien. olim  
S. R. M. Aulici.







